

摘藻堂四庫全書薈要

集部

欽定四庫全書薈要卷一萬六千八百十八集部

震澤集卷二

明 王鏊 撰

詩

送秉之還吳

不見倏七年相見只三月不知三月後又作幾時別  
離苦多會苦少風雨蕭蕭竹窓曉自笑閒官日日忙夜  
短情長談未了我生迂僻寡朋儔坡云海內一子由只

今子由又欲去何以慰我平生愁子今去矣我何有爲  
買湖濱田十畝下栽禾黍上木奴菱芡荷花繞前後讀  
書稍暇來朝班我却歸卧湖山間

對月有懷秉之

當時月出東海頭我居燕南子蘇州燕吳萬里同見月  
兩人不見心悠悠豈知今宵月如舊照我兩人同舉酒  
今照兩人喜昔照兩人悲臨風舉酒還問月悲喜惟應  
有月知月明三五圓又缺遂使人間有離別碣石南頭

震澤西兩地愁心還望月欲知乃兄別後何所為月下  
杯酒長獨持

吳禹疇副使使便還吳江覲省

重明瞻麗正弘治建初元聖作羣方覩星流使節犇費  
蒙頒道里便喜過家門晝日方三接寒暄豈一言趨庭  
嘗獨立加飯為平反王事真無暇親恩亦未諉銀魚羞  
笠澤彩鷁動湘沅石建裙方滌王延被未溫法冠驚豸  
立官誥訝鸞騫鄉里恩光滿人生樂事繁尊香莫留戀

廐吏候行軒

陳給事王汝羞鼈見邀雨不克赴以鼈見饋作詩

謝之

虛負詩人折簡招滿城風雨晚蕭蕭眼前世事猶難料  
巷口人家且不遙鼎謝繆公仍餽肉解憐畢卓獨持螯  
雨晴明日還相過磊塊曾中要一澆

蘭竹

倚蘭漠漠幽人操修竹娟娟君子心空谷日斜人不到

可憐荆棘漫同林

送陳匯之正郎出知曹州

粉署才華藉甚稱一朝白壁點蒼蠅  
邑中牛去真無妄梁上刀懸夢豈曾  
冷暖世情還自笑浮沈宦海本無憑  
斯行却有曹人喜製錦從來是所能

送韓勛

都憲孫

先公老去吾猶及鐵面長身碧眼稜  
海內安危真可佩軍中韓范復誰能  
精忠已見回枯竹奇事曾聞斷大藤

昭代象賢多不薄，獨無雨露到雲初。

送王允常僉事之廣東

椰葉桄榔五嶺南，使君曾此駐帷襜。  
法冠直指新峨廬，包匭生黎舊貢蚶。  
不信鱈魚還作惡，只應泉水便名廉。  
殊方風土須珍重，莫為溪山久滯淹。

送周院判原已還任南京得杲字

前年送君城東亭，今年送君城南道。  
年年長作送行人，每見君歸被君惱。  
君生何好只好詩，相載東歸摠詩草。

玉延半舫最留連  
共月菴前亦傾倒  
醉中勸我不如歸  
只說金陵山水好  
人生出處誰得知  
世路東西難自保  
難自保雲冥冥日杲杲

即事

忽而晴忽而雨  
細雨霏霏洗殘暑  
天意陰晴兩不期  
人事炎涼遽如許  
遽如許黃葉秋林  
蟬獨語

半舫齋種竹

玉汝齋名

誰分碧玉兩三枝  
愛護先教謹作籬  
我欲醉移須有日



客從逕造却無時未分嶰谷陰陽管先和淇園瑟僊詩  
多少世間凡草木歲寒時節始應知

送劉御史還蜀

規

浮世功名何有哉茅齋元住少城隈逢人老去腰難折  
念母秋來首重回古栢祠前傷草色浣花溪上覓橙栽  
臨邛父老如相過不似當時負弩來

送溫生廉還江西

傅學士  
子壻

溫生穎邁仍好修問事不休賈長頭負墻請十不酬一

使我愧爾東家丘詩家不比春秋學三傳猶聞東高閣  
夫何箋註鬪紛然混沌那堪七日鑿子今去矣我一言  
為問乃翁然不然古人亦讀三百篇政也可達使可專  
只今屈首窮心力郢書燕說滋紛惑鏤冰刻棘巧何為  
名成至比敲門石不知清廟有遺音諷誦要於言外得  
茲行不用感別離歸而求之有餘師

中秋夜超勝樓翫月

良宵歌管在高樓萬里青天一鑿流絳闕珠宮真不夜

冰蟾玉兔摠宜秋興來且據胡牀坐醉後還驚大地浮  
天柱峯頭何似此恍疑身到月宮遊

早起

紙牕斜漏白暗室未全明庭樹鳥爭噪鄰家鷄獨鳴四  
牆猶鼾睡壯志獨潛驚萬古一昏曉淹留何所成

耳鳴

耳內真何有年來解作聲磬乎時殷殷蜂也只營營稍  
向喧中息知從甚處生天應憐寂寞將爾當簫笙

顧氏三辰堂

顧野王家學有傳一經休說漢韋賢風雲慣得從龍便  
嶺嶠爭誇觀鳳先天上星躔真有數吳中識語不其然  
高堂要見三為四屈指從今又幾年

奉和匏菴謝橘三首

買地還須共一都已留墨妙付官奴主人正似天隨子  
家住煙波萬頃湖

何須千樹說玄都桃李從來是僕奴讀罷坡翁春色賦

坐令春酒變成湖

青李來禽亦甚都  
木奴應未肯為奴  
他年若論封侯事  
乞取東山一曲湖

和王汝謝橘

休說枇杷與荔奴  
楊家風味摠輸吾  
封侯且得依林屋  
投老何須乞鑑湖  
江上秋風吹短鬢  
天涯歲暮走長鬚  
唾餘有子煩收寄  
一掬他年可百株

贈何醫士

中年多病稍相侵  
委巷衝寒屢見尋  
愧我且非常路客  
因君真見古人心  
玉池洗藥流香遠  
金匱儲書燭理深  
自笑貧家無以報  
只將詩句當南金

送僧歸西山

月明曾借上方眠  
竹几蒲團對夜禪  
落日故園心萬里  
一雲飛處是吳天

史館歲暮述懷次匏韻

東觀才華說孟堅  
相隨無補漫窮年  
謹嚴敢意春秋筆

詮次惟將歲月編文案塵高傷病劣大官日給愧肥鮮  
太平有象須君寫莫把三長讓子玄

除夜三首

明朝成四十今夜復斯須天末幾年住山中三徑蕪無  
聞良已矣漸老欲何如未免王融笑甘為武子愚

明朝成四十學道得蹉跎世事只如此流光柰爾何髮  
從前日短愁向此時多獨飲屠蘇酒臨風一浩歌

明朝成四十萬事付因循乍見少而老相隨病與貧年

年仍故我得得且隨人鮑叔能知己王融莫笑人

送楊潤卿給事按貴州邊儲

翩翩文彩映珊瑚  
烱烱丰標玉不如  
才入鎖門司諫草  
又從荒服按邊儲  
魚由丙穴應持酒  
鴈到衡陽好寄書  
回首前程雲萬里  
此行真是發硯初

送馮原孝知揚州

東南佳麗隔江分  
我昔登臨倚半醺  
瓜步帆檣天末見  
竹西鼓吹月中聞  
高名自昔推揚一  
健足他年失冀羣



父老要知新太守聰明慈愛漢馮君

送林教授致政還閩中

烏石岡頭碧水濱十年不見髮如銀  
特從嶺嶠辭天子乞與林泉作主人  
九牧衣冠還獨盛七閩風月未全貧  
都門曉望車塵遠慙愧當年老郤詵

秋試時林為同考  
得予文比之桂林

一枝  
云

送陳進士恪知宿松

春風江上動牙樯  
鳧鳥南來面若霜  
皖水繞城橫宛宛

瀟山當縣正蒼蒼才名小試新磨劍筆勢曾驚古戰場  
他日宿松還愛我鄰封咫尺是桐鄉

哭原已次匏韻

思穿溟滓刮幽荒郊賀由來命不長菊本無田寧當俸

杏雖有子摠成殤

原已號菊  
田無子

封題未了新詩債餘惠猶

存舊藥方昨日曝書開故篋忍看春蚓一行行

哭張修撰亨父次謝祭酒韻

清詩萬首敵千鍾身世飄然一短蓬早死賈生非不遇

後來揚子亦難逢  
豈知冀北空無馬  
須信人中亦有龍  
珍重平生謝安石  
吳中不負若堂封

喜雨

翠華拂曙幸齋宮  
閔雨何煩紀魯公  
晝氣混濛無殿閣  
夜聲淅瀝有梧桐  
一時朝野歡皆洽  
三日天人感已通  
祭罷雲開還出日  
太虛神聖本無功

次韻楊維立初入史館

東角門前十館開  
史家自昔摠難才  
病容野客隨行入

遠喜諸公取次來氣合每聯朝食坐事多長後午朝回  
揚雄識字今誰及疑義須煩一一裁

李學士釋服諸公有詩趣入史館因次

東觀含毫有所思公翰旁睨已多時汗青頭白非無日  
齒錄牙緋豈所期書到商家真灑灑心同魯國去遲遲  
集賢諸老心如渴早雨公田及我私

次韻廉伯庶子晝寢

世情不合獨醒然午思騰騰只欲眠有約周公多邂逅

無情莊叟漫聯牽梨花院落春雲裏芳草池塘夕照邊  
世事從來俱是夢北牕風月不須錢

贈河南巡撫楊貫之

燠災橫被十三州百萬蒼生手撫柔憲府乍臨新邑洛  
宣房已復舊河流衣冠南渡仍餘宋瀍澗東來尚自周  
列郡分明望丰采安危須共主分憂

送高良新知歸州

江上青山識秭歸江邊弔古駐巖駢夢中馬耳先曾到

行處人煙亦已稀  
屈子宅空江渺渺  
昭君村在雨霏霏  
使君撫字知多術  
夔府如今正阻饑

鄭氏鍾秀樓

隱居還谷口  
擇勝向峰頭  
天近星堪摘  
湖平地若浮  
雲嵐生几席  
日月在簾鉤  
何日同登覽  
超然消我憂

送僧如海還金澤

紫衣不掛白雲身  
闕下多年作外臣  
欲與高閑誇草聖  
豈知賈島坐詩貧  
禪心定久元無著  
世事諳多摠不嗔

他日吳中訪金澤對酬誰作許家詢

送建德尹蔣文廣致政還光福

京塵袞袞鬢毛斑朝捧除書暮乞還  
三徑已嫌陶令晚  
一丘長伴謝公閒  
仍知建德非吾土  
免使移文自北山  
光福楊梅今正熟  
冰盤歸薦鶴頭丹

朱天成寄酒味變

橘林細擣洞庭霜  
風味清甘早自將  
小甕紅泥緘遠意  
舫船玉粒饅餘香  
督郵有郡還能至  
宰相何知合備嘗

猶勝先生號烏有車輪夜夜轉枯腸

九月晦日玉延亭看菊

秋盡燕南菊有華品題猶自待詩家酒澆屈子醒魂杳  
燈晃西施醉影斜九日風光今已負百年世事亦無涯  
升堂細碎還堪擷杜老無庸晚見嗟

題竹贈陳御史瑞卿

玉立娟娟不受塵崑山慣與竹傳神冰霜高節知難並  
捲贈烏臺鐵面人



送林伯方還閩

蘇學教授  
智之子

安定蘇湖教獨行無能還愧老門生  
幾年闊別無消息  
四海相逢是弟兄  
荀氏八龍俱  
駸稟唐家九牧世簪纓  
燕山歲暮征車發  
把酒城東萬里情

朱天昭始第進士主余家至明年移居西鄰

兩年不厭草堂低  
頗愛晨昏出入齊  
長日經過無主客  
祇今相見有東西  
濁醪尚可墻頭過  
歸院那愁柳下迷  
廐馬似知人意思  
臨岐回首再三嘶

天昭子希周失解

前修未遠力須追中道無緣忽自疑  
名似甘羅殊未蚤器如馬援不妨遲  
卑高在手誰能定冷暖於人只自知  
莫怪羲之羨懷祖瑤環重映碧梧枝

送汝行敏知南安

五馬南來百姓懽文章太守屬南安  
郡中召父歌堪續壁上張顛字未漫  
庾嶺梅花春信早吳江楓葉暮吟寒  
到時境內人皆足每食無魚不用歎

聞南安魚  
頗難得

贈全卿

年來老眼旋生花學道無成似煮沙  
事業看君初發軔文章笑我自成家  
懷嵇命駕殊忘遠說項逢人每似誇  
鄉里衣冠今不乏且容老子誦南華

送顧承之還吉安省覲

秋風不用嘆差池利鈍仍知亦有時  
似我從前猶眊眊看君自小已瑰奇  
楚弓一任他人得和璞唯應識者知  
歸到安成春正好過庭還問幾篇詩

方巖書院次謝祭酒韻二首

祭酒李父寶  
慶守所營也

謝家亭館盛當時  
絃誦俄聞發舊基  
鹿洞未能來賜額  
菟裘兼可便吾私  
雨添書帶庭前草  
風動琅玕砌畔枝  
自昔竹林誇放逸  
未應文彩似今奇

方山絕頂白雲銜  
問道來從九四咸  
幾處人煙分海嶼  
此公圖像合嵌巖  
訂訛無復遺魚豕  
擇術先須辨矢函  
誰共舞雩沂上樂  
願隨童冠著春衫

送傅中舍曰會分封魯府

龍節歲蕤寶冊光手函青土向東方曾聞賜履開無棣  
又見歸田自汶陽聽詔山東扶父老揮毫池上侍君王  
別來好在西堂夢雨過池塘草正芳

曰會兄時  
為學士

沽頭行三首贈陳水部

宣

上沽頭與下沽頭上下沽頭慣覆舟昨日使君臨堰上  
沽頭上下是安流

沽頭落日没人行白草茫茫一望平今日東西闌闌起  
月明兩岼讀書聲

使君一日去沽頭父老兒啼婦女愁依舊沽頭成白草  
荒煙古樹挂獼猴

送劉以初下第還常熟

三年京邸不窺園落筆翩翩動萬言頗訝坡翁遺李豸  
不同柳子賀參元暗中得失真難定夢裏輸贏未足論  
月窟依然仙桂在秋風獨鶴看橫騫

送陳員外子章分司蕪湖

東風吹浪碧粼粼君去分司正值春聞說為關非舊日

却思省試是比鄰官曹正對蕪湖好飲興初嘗采石醇  
若遇經過煩借問行船多有洞庭人

寄汀漳守備西指揮

嘗守吳之  
金山衛

幾年作鎮過龍溪記得將軍舊姓西威洗沙尤烽盡滅  
政平海國貢初齊金山別後多成望玉洞閒來且自躋  
緩帶臨戎無一事花驄時向北風嘶

送陳堯弼知會稽

舊知  
吳江

漢廷治遠無循吏千載吳江尚見之備識民間多利病

不知身上有安危來時叔度常嫌暮去後何公每見思  
今日會稽真奪取臨歧還作贈行詩

送張時學知遂安任叔順知定海

五色依然過眼迷常時文彩映玻璃誰能滅沒空驪牡  
又是連蜷賦彩霓七里灘搖江月冷四明山壓海天低  
自慙未得為知己臨別新詩亦漫題

送白廷臣知崇仁

暗裏朱衣未足憑夜牕老眼霧層層長才自信工穿葉



短棹還思過採菱

廷臣家採菱港

百里封疆看小試十年鄉榜

憶同登司徒事業君家事繼美無言尚未能

送周民則同知袁州

匡鼎談詩摠不如春風下第獨慙吾誰云伯樂能知馬  
可是齊王只好筭建業當時同折桂宜陽此日獨分符  
人生得失應難料一命誰當是大夫

送吳大章還宜興

編修克溫父

試罷彤廷便乞還不教名字落人間小團龍鳳春前雨

罨畫樓臺水面山  
文彩傳來多似舅  
功名老去只如閒  
洞庭東望無多路  
楚頌亭成有舊顏

送錢正術還姑蘇

西館橋邊竹隱居  
昔年曾受異人書  
不知官爵能來子  
可是塵埃早識予  
忽地相逢還宛若  
再煩推看定何如  
韓蘇摠被虛名誤  
試問三星是也無

送僧

當時六祖有傳衣  
萬法元來是一機  
若問一歸何處去

本來無一亦無歸

奉和謝氏三亭之韻

望海亭

方巖缺處著幽亭  
岌業多應負巨靈  
弱水蓬萊真可到  
天台鴈宕亦分停  
鬣為帆起當牕見  
潮作風來吹酒醒  
我欲更從高處望  
齊州九點霧中青

仰高亭

亭上悠然坐見山  
東西迴合隱如環  
懸崖有路神先往

叢桂無言手自攀  
理到靜中應自得  
事於身外不相關  
金堂玉室分明在  
何事高人去不還

采藻亭

池邊小立駐幽芳  
異品真疑自樂浪

朝鮮紫片甚美

沙鳥自鳴

還自歇野人相見  
旋相忘擷來淺瀨  
和雲煮歸去頃筐  
帶月湘欲獻吾皇  
還自媿蓼花蘋葉  
委秋霜

送謝祭酒之任南甌

峻節高懷自可親  
兩年史館況為鄰  
久甘靜退元非病

卷二  
相載詩篇亦未貧台右人才多近古當今師道復何人  
者詳學制伊川在士子東南要一新

玉汝看葵見寄

朝退歸來不坐衙門當委巷尚嫌譁不知半舫齋前竹  
何似平廷院裏花清愛雨聲時起聽薦愁日色每教遮  
小軒清蔭都非舊說與西人却似誇

古愚

我自古愚人還作古愚詩古賢不可作古愚亦難而舉

世皆尚同予獨不知時舉世誇疾走予行獨遲遲信口  
所欲言信意所欲之衣不識寒燠路不識險夷喧然衆  
知人指我為頑癡子知邈難及我愚恒若茲

寄題明秀樓

湖上危樓勢不崩北人欲上怯初登檐前月寫澄波影  
天末雲留碧嶂層山水吳中誇獨勝觀游昔日記吾曾  
弱流不隔蓬萊路欲去誰言病未能

送周進士炯還常熟覲省

同年近  
仁子

南宮此日謬持衡一見高文眼為明正喜故人能有子  
忽聞遠別得無情名因實起何妨蚤理會心傳不厭精  
此去海虞誰復見讀書長日掩柴荆

玉汝作東眺軒不忘在東諸君子也次其韻

長日過從興有餘官曹乖隔欲何如有時隱几全忘我  
幾度敲門不是予磔磔林間鳴好鳥斑斑花外度輕車  
城東有暇還相過賓席年來左特虛

諸葛武侯

漢家鹿走犇羣豪中原獨峙當塗高江東割據紫髯叟  
大耳惶惶何所逃南陽南去隆中里草屋數間而已矣  
悠然梁甫日長吟恣作卧龍終不起平生伊呂伯仲間  
自七管樂真謙耳將軍三訪何太堅不臣不見禮則然  
幡然一日起驅策海宇三分指顧間永安宮中翠華逝  
王業偏安豈天意關張顛蹶趙雲亡漢祚終衰枉經濟  
前出師後出師孤臣瀝血書肝脾渭濱敵退大星墜千  
古英雄空淚垂



徐詹端壽詞

神社儲南嶽文昌麗北辰貞元符聖世間氣出賢人燕  
市先招駿徐家舊產麟官曹憐我並德業許誰親自惜  
無雙士同為不二臣性嫌長孺戇文許仲舒純幾共承  
前席常容接後塵交情今鮑叔家世古楊椿已謂才無  
敵仍知德有鄰看君心不展誨我語尤醇醉自忘公瑾  
風如坐伯淳犀通雞自駭魚目俗空珍故業荆溪上新  
思少海垠良金真有價白璧豈無因每愧齊東士常叨

席上賓吳歌非子夜魯史又王春已自忘窮達何曾見  
喜嗔幾枝仙桂茁六葉墮莫勻大火西流近長庚下降  
頻經綸當聖世弧矢屬秋旻寵渥今如是勲名定絕倫  
莫歌昌熾頌座客製詞新

贈顧鏞

鏞顧仲英之孫仲英元季崑山巨家與楊鏗厓等爲詩社有玉山草堂集仲英子元

巨國初從

籍鳳陽

玉山人去草堂存及見濠梁幾世孫傾蓋塗中成舊識  
僑居淮上是清門前朝舊事猶能記南國遺風且莫論

莫怪題詩多感慨曾於名勝集中翻

太平鳥

有鳥有鳥名太平太平時節方來鳴當今天子神且聖  
怪爾日夕無停聲人言此鳥亦如鳳不向梧桐愛萋萋  
上林何樹可相依萬年枝上春風動

送表兄葉志通

客從遠方來過我陋巷口十年積相思舉此一杯酒少  
時同嬉戲今已成皓首行雲游四方寒郊折衰柳中年

常送別不似此分手昔時秦康公見舅如見母今我復  
何為見兄如見舅

小適園桃花忽開

春來未識東風面忽在吾家小圃中斜凭欄杆成獨笑  
東西相映兩株紅

花開猶未報人知花下行吟漫自思花若能言應笑我  
年年無酒只題詩

朝陵欲去更遲遲還向花前舉一卮說與東風莫吹落

我行三日是歸期

花落又作

報道花開方自喜忽聞花落更成傷  
東風太是無情物故作春來一日狂

昨日日高猶爛漫今朝風動漸稀疎  
我行三日歸來看只恐枝頭一片無

魚鱗滿地雪斑斑蝶怨蜂愁鶴慘顏  
只有道人心似水花開花落摠如閒

朝陵行

山行自好況清明朝陵偶作東門行

此日子獨行  
出安定門

青山

百里恣奇覽怪哉風伯何無情怒木驚沙鳴不息四野

無人日無色垂頭闔眼信馬行咫尺有山者不得昌平

少憩朝躋登眇眼一洗猶曹騰夜深星斗光若動黑雲

膚寸從東升歸程復指昌平郭萬竅號呼止還作曾聞

飄風不終朝我行三日三日惡平生萬事多乖違感爾

風伯能追隨前日相迎今日送眷戀豈要賡前題

舊有  
大風

聯句  
還家類面坐未定天日融和風寂靜

遊京城西山三首

賞心多與宦情違三載來遊一日歸樹下杯行殊草草  
水邊人去更依依郊原却略青驄度天水蒼茫白鳥飛  
回首青山應笑我漫將塵土浣苔衣

三年渴思玉山泉濯足盤陀一爽然寒漱石根鳴泱泱  
光搖雲影淨涓涓諸賢好作山陰會老子仍工水底眠  
汲得一瓢城裏去需為甘雨灑炎烟

出郊風物兩閒閒  
眼底江南頓覺還  
金闕五雲浮玉氣  
玉亭千古識龍顏  
地除陽子應無水  
天盡中原合有山  
何事宋家三百載  
只披圖志望嶺巔

匏菴惠鶴

鴛鴦困雕籠  
鸚鵡在金索  
人情雖甚憐  
物性終不樂  
不如鶴性閒  
近人殊不愕  
雪中立伶俜  
風前步略却  
或俛啄蒼苔  
或側睨冥漠  
儵然物外情  
自得彼此各  
所以亦樂園  
一名為一鶴  
歸來睇小園  
欠此殊寂寞  
清晨坐茅



齋蘇帖宛如昨人從玉延亭致此小窄寧應憐我家園  
草樹頗荒落青泥黃葉間此物殊可著風清月夜時相  
應如唯諾鶴貌自孤高公意尤不薄便當掃園亭小池  
為汝鑿鶴鶴來我前今日與汝約汝本九臯禽非人可  
籠絡既為詩家玩又受主翁託有木從汝棲有泉從汝  
淪雖無乘軒貴止此亦不惡切勿隘吾園不足恣飛躍  
一朝凌天風萬里向寥廓

代簡速仲山

仲山將  
使河南

漸覺交游少常嫌公務忙  
印初辭省內節未向河陽  
天遣閒多日君當醉幾場  
貧猶能釀酒病不廢詩章  
竹卷題堪續茅齋興甚長  
可能醒過日况是語同鄉  
道里東西近情懷爾汝忘  
比來閒可得別後望徒傷  
坐只匏分席香餘菊佐觴  
便來同一醉鄭驛不治裝

匏菴和樂天五十八歸來因同賦

五十八歸來於我似差速  
其如迂懶性世事昧五六  
多病況早衰鬚髮失舊綠  
辭家今幾年但看庭前木  
寸根

手自移今已如立竹從公歸去來家住湖山足

送陳郎中一夔錄囚

西曹社友多分散獨有夫君又別離  
雨露九天踈滯獄關河千里赴襟期  
篇章自愛陳無已經義多推雋不疑  
他日歸朝敷奏罷解裝還有幾篇詩

匏菴臂疾予問之偶遲有詩見貽次其韻

偶因請告得閒身子墨依然日見親  
湯媪曾聞能作崇

匏有湯媪傳竹奴何事亦欺人  
疾以竹簞致堂前客至唯長揖池

上詩成一欠伸自咲東鄰來問疾如何翻後陸徐陳  
送張學士廷祥之南京

除書一紙墨淋漓同向彤廷舞蹈時實錄兩朝無字愧  
高名四海是人知東山強為君恩起南國多因母老移  
門對鍾峯無一事日高睡起好題詩

郊祀齋宮次仲山韻

爐烟起處望行宮狹陞登呼拜舞同九色繡旗斜晃日  
兩行銀甲儼趨風園丘絕壑飛橋過傑閣凌虛複道通

獲觀明禪誇盛事不才深媿後諸公


贈梁都憲巡撫四川

赤甲白鹽雄作鎮鐵冠繡斧凜先聲雪山已為來時重

應聞去後清殿上位虛中執法邊頭人散小團營

說與蘇明允畫像無煩記姓名

震澤集卷二



總校官庶吉士臣張能照  
校對官庶吉士臣陳崇本  
謄錄監生臣王詔

欽定四庫全書薈要

集部

震澤集卷三

四

詳校官候補通政司經歷郭祚熾



欽定四庫全書薈要卷一萬六千八百十九

集部

震澤集卷三

明 王鏊 撰

壬子校文南畿得詩十二首

楊柳青舟中見月

楊柳青前楊柳殘  
南人北望思漫漫  
從來共月菴前月  
今夜蓬牕獨自看



淮口值風舟幾覆

柁折檣傾舟晏如風濤淮口戒心初跛行豈賴婁丞相  
魚腹幾從楚大夫平地人於看處愕陰功神定暗中扶  
道人無懼還無喜斜日船頭自照書

過揚子江

燕南倦客江東去一見澄江眼為開紅日遠疑從地起  
青山近欲傍人來中流擊楫空懷志南國扞衡獨愧才  
漸覺故鄉風物近十年一到思悠哉

宿龍潭驛

驛舊濱江危  
甚今移向內

崩崖百丈俯驚湍未到先憂到却安  
夜枕江聲宜客夢  
午牕山色任人看欲尋往事空題壁  
不廢公程且解鞍  
眼底桑田與滄海人間得失浩漫漫

舟發龍潭驛

王氣東南日夜浮畫船十隻向神州  
山當好處如曾識  
江到平時只似游兩岸人家從北固  
六朝事業付東流  
天風莫送征帆急景物詩家要細收

觀音山

大江東畔小蓬山山下時魚近可扳蒼玉千年浮浩渺  
白銀萬頃漱孱顏諸天眼見虛無裏一葉身驚出沒間  
不是舟人無次第要將奇觀與人看

至金陵

白下秋風擢桂枝桂枝今日豈吾司鍾山宛宛行來見  
淮水悠悠別後思平市烟花應我識前朝陵寢没人知  
道傍不用爭先睹便是當初赴試時

場中初九夜有感

復閣周垣深復深  
重門魚鑰夜沉沉  
海潮忽涌鼙聲動  
山雨橫來筆陣侵  
鏡出秦樓憐我忝  
馬空冀野定誰任  
悠悠淮水東邊月  
十九年前此夜心

中秋夜

未謂中秋今夕是  
外簾瓜果特多儀  
月侵屋入窺文卷  
席趁簷斜閣酒卮  
豔魄不辭忙裏看  
新寒先報客中知  
燕山海月同誰賞  
北望詩成有所思

鹿鳴燕

京城人馬簇如煙秋榜何人看獨先折桂也應懷此日  
插花那復似當年網羅麟鳳東南盡坐應奎星上下聯  
記得畫堂東畔席和家衣鉢定誰傳

朝孝陵

碧城睥睨斲山根山勢東來聳獨尊天上龍文成五彩  
地中乾象應三垣平成萬世功思禹冠帶中華陋洗元  
聖烈神謨三百冊小臣瞻拜復何言

陳朝舊城

江東天險天削成長江為塹山為城南朝天子慎封守  
城外築城隨地形盤盤青山出復沒築城密補青山缺  
龍潭起至金川門百里綿延城不絕青山四繞城四周  
鴈飛不過神鬼愁北兵縱健無羽翼禮樂兵刑何用修  
益州樓船夜飛度雖有金湯没人戍

歸省過太湖

十年塵土面一洗向清流山與人相見天將水共浮落

霞漁浦晚斜日橘林秋信美仍吾土如何不少留

歸自西洞庭阻風登鼇山絕頂

親朋挽衣留不住逆風舟向平灘駐灘頭寂寞誰與言  
青鞵飛縱顛屣步鼇頭戴山山不崩東望東海西吳興  
羣峰羅列七十二如拱如立如犇騰我行天下亦多矣  
所至有山或無水其間有水却無山何處能兼山水美  
蒼茫萬頃浮孱顏惟有海上三神山杳然可望不可到  
不如此地日夕隨我往與還胡為十年纔一到風乎爾

知吾所好

將發阻風

晚發西山舟欲北  
天風吹我復還家  
十年一到非容易  
獨立平原看稻花

將發阻雨

前日風相欸  
今朝雨特留  
平生故鄉意  
欲去更悠悠  
秉之送至京口  
別去有詩和之

隔江相送望蕪城  
四海悠悠見汝情  
事觸悲懽心易醉



別牽南北夢先驚日邊莫負看花約湖上還尋種橘盟  
惆悵金山一回首秋風獨作薊門行

又

相送不知遠直到江頭住遙遙一片心隨我江北去子  
心在江北我心在江南身心不相謀日夕長酣酣

過長江

微風細浪平如席金山焦山纔咫尺羣山簇簇天際浮  
點染長江好顏色

宿遷別安隱兄

年年積相思  
兄南弟在北  
一朝兄北來  
弟作南歸客  
弟北兄復南  
草草途中見  
見時未交言  
船開激如箭

興濟阻風速沈方伯時賜飲

徹夜陰風河欲凍  
扁舟牢碇古河濱  
南飛坐羨帆歸疾  
北上惟將夢去頻  
客路寒暄同是客  
人生行止豈由人  
蓬牕孤悶憑誰破  
賴有江南麩米春

舟次直沽別沈方伯次其韻

好山好水吾已瀆況值秋風橘林綠南來十日謀北轅  
不語岑岑怨林木使人行處何所為廩人繼粟庖人肉  
蓬牕閒寂却成愁恰似蘇子居無竹其間文史豈不翻  
無味紛紛成故牘家山回首頻入夢欲去未能慙薄祿  
德州城下斜月昏萬里河來失平陸舟中夜靜聞吳音  
驚問誰歟曰南牧心期乃是夙所親倒屣過從忘僕僕  
聯舟會晤迭主賓百里風帆岸相逐自移畫省大江西  
愜悌民間歌旱麓公餘亦不廢吟哦歷歷詩書載其腹

高詞往往逼古人，義手而成如構宿。往年贈我石蘭篇，  
每向荆溪望林屋。謂言他日片帆過，便風徑訪愚公谷。  
世情多厭屈原醒，宦路尤欺魏其禿。多君佳句屢見投，  
過望平生非所卜。天津橋下水留人，去住人生有遲速。  
回思聯艦那可再，食野啣啣怨鳴鹿。夕陽沽水丁字流，  
白草茫茫人去獨。

寄題拱北樓

紫微華蓋擁宸居，拱北樓成勢有餘。沽水繞城斜作字，

人家濱海半為漁草間狐鼠收妖氣天上風雲賀寵除  
記得泊舟衰草岫月明槐樹影踈踈

恭毅章公挽詞

六駢北狩塵不蒙秋槐深閉南城東瑤臺有月蝕蟬螻  
沂國典冊移青宮中山誰復歌晨風桓桓章公血淚紅  
一章獨上驚盲聾何言周昌叔孫通直欲下從龍逢翁  
皇天后土昭至忠風雷激電陰霾濛當時直節誰並雄  
前有廖莊後鍾同一朝海內日再中疏傳萬口聞天聰

擢少宗伯不為崇南邦宿留遂以終當時定策還自功  
依然廊廟稱孤公

送薛金下第還江陰

河東三鳳不須奇又見瑤林玉樹枝  
桂子秋風真有種  
杏花春雨豈無時  
陸家莊好應誇我和氏  
衣存欲付誰  
江上幽亭人不到  
青山相對了殘詩

送華泉下第歸無錫

一語曾看決壅川  
十年文思涌如泉  
科名高訝居王後

鞭策加應在祖先安定蘇湖吾偶爾河汾房杜子其然  
鷺湖風月誰收管知抱遺經夜未眠

寄河南顧叅議崇善二首

黃河萬里拍天來列郡仍聞奏旱災今日漳濱誰史起  
稻粱千頃變污萊

曾子何曾解殺人市中有虎未為真清時正是功名會  
莫為吳山早乞身

苦熱

鬱蒸昔憎南愷爽近便北今年旱太甚萬里雲天絕展  
簞趨樹陰短氣不能息渴鳥妄投林向人若求食吁嗟  
六合內誰是清涼域唯當希靜勝庶以永今夕

### 喜雨

病身牕下兀然蘇屋溜幢幢勢若驅坐喜炎埃隨洗濯  
立看生意上焦枯論功合有人調鼎受賜還同天雨珠  
孤負明時無好策漫將詩句和童雩

時以久  
早求言

又



無才甘遐遺因以靜自適長衢去馬踈深巷來轍隔雨  
餘草木長樹杪梨欲坼煩襟忽然醒如饗九鼎食新涼  
不嫌貧於我亦有獲屏書去不觀兀坐面東壁水深蠅  
欲鳴日入鳥還息為謝揚子雲無玄安取白

送盛進士應期歸娶吳中

終生文彩棄繻辰建業秋風擢桂新闕下杏花還屬子  
召南桃葉正宜人上章許得天顏笑奠鴈光生故里春  
大小登科俱入手高堂況有黑頭親

送歐陽子履董廣東學政

其兄亦以副使董學政

六一風流殊未遠一門雙壁價能齊  
超升同日司文柄洗濯多年出字溪  
鳳沼揮毫奎宿逼羊城按節瘴雲低  
朔南此去應漸被聲教行看到四黎

送人之南豐

文章星斗南豐在縣說南豐意嚮之  
千里聞君當教邑後生文體更誰師

送吳編修克溫歸省宜興

玉堂退直幾相從  
茗盃薰鑪坐晏春  
遠別芳洲生杜若  
清詞秋水出芙蓉  
交情淡愛周公瑾  
宦況輕懷邴曼容  
問罷起居還就道  
渭陽雲樹思重重

送同年俞副使濬之四川兵備

控帶西南坐上游  
安危須共主分憂  
蜀人到老懷張詠  
邊計從前仗武侯  
地遠烏蠻耕更早  
天高白帝鎮橫秋  
雪山不見南來鴈  
書寄同年幾日收

送夏璪下第還江陰

家聲戚里流傳久才氣科場挺出殊自昔崑山誇片玉  
一朝滄海得雙珠其弟同登鄉薦市中定價誰高下暗裏朱衣  
信有無歸去江頭養神駿春風歷塊省過都

送白進士金歸省

才思瀾翻涌若潮青年頭角見蕉堯一門袍笏還追李  
八葉箕裘正婉蕭發軔早收仙桂籍過家還下采菱橋  
榮歸況是江南樂不用臨岐贈柳條

送陳瑞卿之臨清兵備

北來作鎮重才猷齊魯權兼坐上游官職朝廷猶耳目  
地形中國是咽喉塞帷尚記來時面借箸應煩席上籌  
春入四郊狐兔滅月明還上庾公樓

送張叔亨御史按雲南

平生高義想穹窿京邸年來會面重清論坐中消客氣  
威稜行處懾妖蹤隴江行李來時路熨道音書到日封  
烏府深嚴公事少日長誰與坐從容

送李文選唯誠冊封岷府

使節南行振玉珂  
湘江木落洞庭波  
漢朝赤土分封遠  
楚國菁茆入貢多  
夢渚草長歸眺望  
蕪湖家近好經過  
却嫌選部仍虛席  
不得淹留柰爾何

送仲山之任廣東叅政

十年送盡南歸人  
今日誰知還送君  
歸來寂寂掩關卧  
無語目睇南飛雲  
與君相從亦云久  
對語真如飲醇酒  
朱絃疏越音有餘  
明水著鹽味多有  
君才於我真得師  
簿書堆裏還題詩  
詩詞鬱碑古鼎器  
字法瘦勁枯藤枝

嶺南此去無多路目極燕山天盡處青山杳杳不見人  
秋鴈飛來復飛去政成幾時召還闕還對共月菴前月

我生

我生抱幽憂有癖結中抱當喜常咨咨居常殊悄悄一  
朝逢至人如夢忽呼覺至言何須煩胸中殊浩浩古今  
等蘧廬生死一浮泡委順齊寵辱冥懷無醜好得之亦  
不驚失之曾不懊一身自悠悠此外何足道長揖謝至  
人聞此苦不早

奉和匏菴讀白集二首

覓句年來無一長日携白集嗅餘香一篇自可讀幾過  
諸格今仍得未嘗當日秦吟能伏李後來崑體漫稱楊  
平生却怪韓員外只識張家奉禮郎

此老生年七十六何曾一日沒詩章風流轉覺堪師我  
政事傳聞尚在杭生世莫嫌殊已晚題詩不害稍相方  
所嗟得見年差晚旋讀前頭已旋忘

和獨林飯



平生翰苑詩書腹，此日野人藜藿腸。  
金谷萍虀殊可厭，蕪亭麥飯畧相當。  
煎湯未用呼鶯粟，貯廩唯堪與鶴糧。  
若說菜根風味好，小園多有不須行。

吳人謂轉買為行

匏菴因菜根之句復次前韻和之

鷓齒生憎玉蔗漿，短齏真稱腐儒腸。  
若論滋味風皆下，便說酸寒理亦當。  
千里遠陪吳下政，多年何用禹餘糧。  
康侯去後誰為賞，耕織還須問當行。

鸚鵡二首

正坐多知巧言語終年羈絏在華堂不如尺鷃藩籬畔  
高下枋榆自在翔

我欲開籠縱汝飛隴山雖遠尚堪歸歸時莫更多言語  
浪說人間是與非

白髭嘆

我年三十九白髭有一莖當時初見之妻子殊為驚今  
年四十二白者日益多朝來明鏡中對之不復嗟人生  
天地間老去會不免猶勝嚴終輩終身不得見

送白主事輔之還任南京

採菱江上憶曾經  
百里人傳聚德星  
報政三年還過闕  
聞詩一月正趨庭  
馬家羣從眉多白  
豸府中丞鬢尚青  
他日同朝喬梓並  
應煩聖主賜雲屏

送嚴太守永濬知西安

五馬初分竹使符  
西安風物尚西都  
三秦子弟為編戶  
四塞河山入版圖  
楚國梓材元自有  
周家風化未全蕪  
旱災已息流移復  
為訪當年鄭白渠

贈畢生昭

同年嘉會之子

少年落筆便蒼然三禮君家信有傳我覺後生真可畏  
子於同輩復誰先一枝仙桂花相付百步垂楊葉慣穿  
他日山東看小錄程文還有幾多篇

海月菴觀燈

蓮花深屋賞來曾蔗盃寒漿渴飲冰月好自尋燈作伴  
雪寒惟許酒為朋興同老子復不淺年與先生自此升  
東壁餘光願終照夜深羸馬慣能乘

送孫廷憲訓導之夏邑

好在孫明復舉比夏邑臨春歸孟渚野雲散碭山陰梁  
宋詩書古江淮控帶今睢陽雙廟在為我一追尋

二月雪

一冬天氣暖如春雪到春來見却頻令攷東皇增料峭  
凍含西嶽獻嶙峋郊原潤洽晴為雨牕戶虛明夜向晨  
三白豐年稱上瑞如何宮柳漫含顰

贈楊君謙

時君謙  
有歸志

夙懷抱悵獨行與世多忤京華二十年壯志遂遲暮悠  
悠深巷中盡日斷來屨楊子獨何為逝言遠相顧移家  
濁溝上破屋終不去人問何以然無乃以我故朝過講  
道玄暮過話情素君慕哀駘他我思黃叔度相見各欣  
然誰能詰其故我欲永從君君且為我住無為忽去茲  
雲山恣高翫蓬蒿張蔚宅依然還塊處

送茹鑿知唐縣

南省曾看驅筆陣中山坐見播風謠萬家赤縣仍為冀

千古青山尚記堯蟋蟀詩中懷舊俗桑麻影裏布新條  
國朝循吏今誰是青史無令久寂寥

送張汝勉知祁州

祁州今日為京輔一命還乘太守車  
場屋偶然窺制作  
崑山信矣富璠璣源流共詫家聲遠  
緣飾從知吏事餘  
若到滹沱煩少駐投文水底弔當初

哭同年劉景元諭德三首

迂癖平生不受鍼兩迂相合作同襟  
傷哉賈氏清時淚

嚼若楊公莫夜心郢質既亡誰為斲伯牙雖在罷彈琴  
高坡門巷西州路短笛斜陽落葉深

落日船頭見素帷夢中昨夜哭君時交游四海今誰在  
心事平生我最知博失鄭僑疑莫問直懷叔向淚空垂  
臨終老眼猶能視免得區區諫用尸

壯氣胸中屹不平九原理骨尚崢嶸抗章未請朱雲劍  
屬纊仍全子路纓坐上直言常駭俗暗中清節不求名  
奸諛未死君先化史鉞何年地下成

君嘗恨近代史不公欲出己見作一



書名

史鉞

宿樊都尉翠微山莊

攢峰缺處望亭臺石室金堂為客開坐見野雲從地起  
卧聞山雨到牕來秋聲颯沓驚濤洶暝色巖從遠壑哀  
自笑詩人能好事連宵抱被宿崔嵬

病間偶成

悲風急景窮陰日布帳匡床卧病身豈謂光陰還屬我  
如何造物亦欺人往來禮斷翻為適寵辱心忘不厭貧

聞說伯恭還進學病中真可養心神

紀夢

有苑者樹其石唯磐有二道士對坐儼然而我何為亦  
叅其坐有一道士顧而貽我非藥非石錯落璀璨或從  
取之我食其一覺而甘香我病如失仰睇道士雲山邈  
然安得從之終身周旋

讀白集

朝事不預聞人事不復理家事不復關身事不復治脩

然卧榻上乃至無一事長日誰與言太原白居易

懷山

我年四十四鬚髮已見白況復秋冬來尪然抱羸疾強  
顏班行中公私有何益既不能隨時又不任陳力獨無  
百畝田獨無五畝宅一朝辭祿養何以謀代食欲留諒  
不能欲去且未得公私兩乖違轉展復反側行藏去住  
間賢者逃不惑若非太阿鋒割斷利名索一朝復一朝  
到老終役役古人邈已遠近事堪法式不見毛貞甫四

十挂朝幘

病起

青青園中樹鬱鬱墻根草灼灼籬間花霜前並妍好我  
行忽抱病兩月跡如掃今日下庭除樹衰草亦槁籬菊  
云耐寒亦復不自保嗟嗟物皆然人生得無老

哭遜之振之兄三首

吾生終鮮甚尚賴兩三君故國多時別凶音隔歲聞天  
涯相顧影日莫獨懷羣南望無窮淚青山空白雲

餞送望亭驛樓遲震澤壩迴思如昨日少別遂終天轉  
覺人生隘空滋客淚懸小樓風雨夜不忍讀殘篇

少小嬉遊熟中年隔絕多兄今長已矣吾此復如何書  
至猶疑信悲來欲嘯歌唯餘寸心在歲晚諒無他

和秉之再到京口有懷別時之作

長江不斷流今古客子重遊感歲時白髮催人來有信

予年四十五  
始見白髮

青山笑我去無期城邊燈火孤舟夢天末

樓臺遠道思風物依然人不見月明雙鴈起前陂

送僧方冊歸善權寺

荆溪東望夢峻嶒欲訪坡翁惜未能今日上人飛錫去  
西風誰與攝衣登洞汭玉帶追仙李泉落銅棺漱古藤  
他日三生堂外見山人應訝我來曾

抱子猿

莊周亦有言虎狼仁獨至今觀王孫猿其性復如是胡  
為吾人中乃有樂羊輩

長嘯猿

金方口人卷三  
卷三  
蒼岷洶若崩古樹吹欲折峽江萬里來黑風夏飛雪哀  
猿啼一聲行人若為別

過南夫內翰於玉延亭

雨過池面魚應樂秋入林間鳥不驚亭上主人何處去  
我來門徑覺全生

冢宰三原王公壽詞

勲名金匱得全收剛度人間八十秋洛社溫公甘獨樂  
江湖范老足先憂何年更為蒼生起此日聊從黃石游

杜行去來多內降六箴誰與獻宸旒

和周少宰伯常得孫

賀緘雲錦織天孫慶與徐卿異日論眼底詩書先付托  
膝前啼笑賴溫存名駒汗血元無價麗水生金信有源  
四世五公看盛事于家何必更為門

宜興張氏雙桂堂

曾聞天上桂華孤不似君家有兩株千里燕吳還接葉  
一門金玉本連跗陰功信有栽培力學海寧忘灌溉勗



從此邵林誰復羨荆溪金紫有先圩

送李茂卿大理還嘉魚

嗟哉何物名與利犇走海內無窮已紛紛之中誰獨超  
嘉魚兩卿伯仲李仲卿見道何太先三十不復舉進士  
徒行萬里訪白沙欲挽南溟供洗耳伯卿少貶來京師  
三年大理何曾理支頤終日望西山眼近簿書如著昧  
有時開口恣雌黃上到周公下朱子瑰詞異論駭傍人  
造謗興訛殊未止我生與世百無合門報君來僮僕喜

小齋款語每終日儀部君謙昔參此君謙去矣君尚留  
君今復去吾何以家居苦貧仍歲惡往往人家半扉水  
午煙未起朝爨清且趁官家五升米謂予不爾第書來  
黃公山下臺成矣從來一士係興衰胡為間此兩兄弟  
未論抹敗與扶顛激懦廉頑功不細送君極目洞庭波  
木落瀟湘風暮起

宜晚軒

旋鉏荒穢彊名園小結茅茨便作軒行處藤枝還自倚

吟餘貝葉亦時翻閒居未擬潘生賦知足先師老氏言  
長者有車時見過願聞何處是真源

八月十六夜匏菴携酒過宜晚軒

新開竹逕貯秋多携酒煩公每見過月出未高公已去  
夜深其奈月明何

月夕花朝送酒頻朱周李趙陸徐陳十年亦是須臾事  
對月今宵只二人

贈朱相之分司蕪湖

蕪湖小院駐皇華  
江上青山正對衙  
此地知君非久住  
庭前石竹為誰花

和楊侍讀介夫得子

生男自好況憐才  
杏子生仁菜有臺  
阿大喜多猶未老  
之無識遍尚云孩  
科名十二看重拾  
家帙三千取次開  
說與眉山諸草木  
蘇家秀氣數應回

程李二學士承命教庶吉士

列宿曾聞數應天  
詞垣師授選唯賢  
玉牕雲霧朝生研

絳闕星河夜動椽沂上舞雩多樂事洛中心印有真傳  
從來程李東西近桃李新陰接講筵

送吳禹疇之任廣東兼柬仲山

曲江看花三百俱誰其厚者吳與徐豈唯鄉邦語音合  
亦似道義心情孚流光轉盼一十九反覆中間無不有  
京師再到是姻家嶺嶠同行作寮友君才俊發不可當  
利刀切玉如切肪聲名朝到暮騰發依然遲爾雙來翔  
避暑傅氏山莊次陸學士廉伯韻二首

偶然携酒作郊行，纔出塵中眼校明。  
歲月幾何新景象，河山百二舊神京。  
初涼道上行人影，斜日村中打麥聲。  
一片渴心何處寫，轆轤金井上銀瓶。

北來燕趙舊山川，平野蒼茫海色連。  
客子行游非素約，野人墟落自成廛。  
尋涼有馬能知路，弔古無碑可問年。  
九日忙時閒一日，新詩莫惜被人傳。

和莫曰良早朝之作

澹河殘月影層樓，玉樹初驚一葉秋。  
闔闔洞開天語近，

觚稜斜轉日華浮仕途一任王融笑清世空懷賈傅憂  
誤矣腐儒無寸補終年簪筆傍螭頭

陸鳳剗股愈母疾

病居母痛在兒兒生無母生曷為千方百禱摠無驗精  
誠一點天或知夢非夢覺非覺若有神人默相告由來  
母子本一人母如可贖寧百身槃水加刀刀自躍一片  
紅綃如玉落遺羹未似穎封人宿瘕潛癥如水沃人言  
孝行真難作以禮律之無乃過君不見世間吳起輩紛

紛母病在床如不聞

送周駙馬祭告孝陵

三日風雷偶示愆  
駿犇千里屬親賢  
天心仁愛乃如是  
聖德馨香豈此然  
北固江山龍虎壯  
南州人物鳳麟先  
歸來宣室承清問  
應為蒼生席屨前

次韻馬少卿經筵紀盛

紫閣黃扉敞肅清  
曉鷄聲裏候天明  
腐儒挾策趨朝署  
天子垂衣坐邇英  
齋已敢忘程正叔  
疏家多笑鄭康成



從來端本澄源地淺學無裨愧此生

寄陳一夔

予北上陳自刑曹外  
補相值於南旺湖

雲昏月黑雨泔泔不見來船識語音深夜張燈仍喚酒  
未明捩柁又分襟浮生聚散鴻留跡過眼功名鐵作心  
南旺湖邊分手處懷君回首一高吟

送王懋倫僉事之蜀

懋倫成化末自翰林  
外謫今召擢憲僉

君不見唐永貞宋熙寧國權盜弄威恣行扶奸黨穢擯  
異己蠻荒瘴徼多公卿又不見唐元和宋元祐天開公

道明如畫海濱淪落皆來歸羣小蒼皇侶虵狄人生行  
止豈偶然宵人紛紛空作奸當時只說鬼謀秘今日那  
知天道還送君此語君應笑劍閣蛾眉好登眺

天昭御史家藏王朋梅畫屢失而得

烟雲過眼真何有每為征東轉覺親劍化延平應有數  
珠還合浦亦緣人棘猴技短心良苦寒具年多跡未塵  
記取長公菩薩記不煩呵護借靈神

內閣賞芍藥四首

玉殿東頭紫閣陰  
仙葩香煖五雲深  
栽培尚荷宣皇力  
開落聊觀造化心  
香藹受風紅  
婁嬋柔條上  
雨綠侵尋  
謝公詩好難為和  
繞砌空嗟盡日吟

養花天氣半晴陰  
紫艷看看逐日深  
南國浪誇金作步  
廣平曾是鐵為心  
芙蓉江上色堪並  
桂子月中香莫尋  
回首揚州那可到  
凭闌休作越人吟

東皇倩汝送將歸  
小雨花間密復稀  
色映鳳池分曉潤  
香薰芸閣擷春菲  
金盤露滴九重迴  
玉盃風款一尺圍

不似江南三月見蕭蕭籬落野人扉

紫泥封後未言歸半下朱簾晝漏稀鄭國由來歌芍藥

衛人何用采葑菲

韓詩  
叶平

開齊似剪霞添色盛極唯愁月

減圍聞說花時多勝集閣門向晚尚留扉

### 沈石田寄太湖圖

遠寄蕭蕭十幅圖霞明霧暗雨模糊眼中覺我無雲夢  
曾次知君有太湖溪壑懷人如有待烟雲入手若為逋  
黃金萬樹秋風裏撥棹西來莫滯濡

弔文山遺墨

錢世恒憲副  
家藏被火

柴市悲風畫作陰遺言一字抵千金青泥不化長弘血  
白日還昭豫讓心千古乾坤留突兀六丁雷電下搜尋  
貽書好為參元賀免使英雄淚滿襟

贈彭都指揮督饗南還

橫槩臨江氣亦豪風流文彩映戎韜樽前暫借留侯箸  
家世曾傳呂氏刀白下看花懷契義湟中積穀仗賢勞  
前人名在凌煙閣颯爽猶懷鄂與褒

延詰初就外傳

匏菴西塾也

宮牆數仞豈云低童子何知亦許躋問學不殊山進止  
吾伊只在巷東西詩書老去還堪付頭角年來欲漸齊  
勝事要留為世講庾郎非是厭家鷄

題手植樹

城南乞得野人栽小塢和雲手自培半尺垂垂今十丈  
主人猶自未歸來

送表兄葉存仁還洞庭

少小真如同隊魚相逢又見白髭鬚細詢親舊今誰健  
聞說田園半已蕪勤儉起家還仗子文章鳴世獨慙吾  
何年吳下相從去烟月茫茫渺太湖

送鍾欽禮還會稽

會稽山人其姓鍾丹青之外詩仍工若耶溪上弄雲水  
誰將姓字徹九重文華殿前見天子受釐三日居齋宮  
東廂落筆風雨疾指盼屢得迴重瞳重瞳一分甲乙  
御筆親書為第一峰巒慘淡李營丘烟雲滅沒王摩詰

詔令內府賜麟蹠又向邊城落戎籍山人拜舞前致詞  
草茅何幸逢明時金坡玉鎖天上見惜臣老矣無能為  
鑑湖一曲臣所好細草幽花夢中到勅賜烏紗作外臣  
白石清泉恣游釣雲浩浩江悠悠山人去矣誰為留人  
生雖云故鄉樂大隱金門亦不惡君不見東方朔

長安新堤成

新築沙堤鏡面光五更行處月如霜爬沙穩襯青驄軟  
繚繞斜依玉署長正喜將軍能了事

李錦衣所築

敢云丞相



獨相當回頭笑指成河處六月霖霖也不妨

往時長安道中霖雨

多成河

經筵次林祭酒韻

國朝經筵之開月三三旬之二是也然孟夏朔有事  
太廟次日輒從免弘治十年四月太廟饗罷有旨改  
是月之三日至日雨又改四日蓋聖學之勤不以事  
而輟也是日齋與大司成林亨大同講林有詩因次

韻

從來王所賴居州對越方勤合少休  
雨脚壞期仍改日  
天心納諫信如流  
重瞳屢矚情無厭  
精義敷陳語不浮  
海內人人誇盛事  
大書誰合秉春秋

送史進士巽仲歸省溧陽

史溧陽故家出  
自漢史丹云

行人猶指故侯廬  
喬木森然是漢餘  
一見丰容欽閎闕  
再驚文彩得璠璣  
瀨陽江上應聞笛  
顯惠祠前好下車  
將子秋來期莫負  
西風南望正愁予

忠節祠

吳有雲宜興人洪武初雲南未下上曰卿能為朕作  
陸賈乎雲頓首請行卒死之成化中守土官以聞詔  
贈尚書諡忠節作廟滇南與王忠文並祀焉忠節之  
死事具國史

真人起敵運隳滇南由葉鷓張何為武臣請師殄勿遺  
皇仁如天兼覆之曰汝雲葉且平汝能與朕為陸生一  
使功賢十萬兵邊人獠圖反噬劫我使臣改椎結使臣  
指心向天誓頭可斫臂可斷服不可異中郎旄侍中血

前有忠文後忠節滇南澶漫雙像設千秋萬古廟食不  
歌

延詰冠

生男喜見髮毳元服雖榮未敢誇道自魯人期一變  
冠依周制重三加鳴珂遠近賓皆至綿絕東西位不斜  
願得成人從此始禮行免使外廷譁

震澤集卷三